



INILAH ilham pelukis mengenai sistem bas udara yang mungkin digunakan di Kuala Lumpur, sekiranya kajian yang dijalankan didapati sesuai.

KUALA LUMPUR, Selasa — Ibunegara akan mempunyai sistem pengangkutan termoden — bas udara — sekiranya kajian yang dijalankan menunjukkan perkhidmatan itu praktikal.

Menteri Wilayah Persekutuan, Datuk Amar Haji Taib Mahmud ketika mengumumkan demikian hari ini berkata, sistem tersebut yang berharga \$9 juta untuk setiap 1.5 batu telah disyorkan oleh pakar dari Sweden yang mendapati ia paling sesuai dan bagi mengatasi masalah kekurangan ruang di Kuala Lumpur.

Menuruti beliau, kementerianya sedang mengkaji sama ada ia sesuai digunakan di Kuala Lumpur seperti yang diarahkan oleh Timbalan Perdana Menteri, Datuk Seri Dr. Mahathir Mohamad baru-baru ini.

Memuaskan

Katanya, sistem itu yang dicuba di Zurich dan Kanada didapati sangat memuaskan.

"Sistem tersebut akan dilaksanakan sekiranya ia didapati paling ekonomik dan sesuai dari semua aspek," ujarnya.

"Kami kagum dengan keistimewaan sistem bas udara yang menjimatkan ruang permukaan terutamanya memandangkan Kuala Lumpur mempunyai ruang yang terhad bagi sistem pengangkutan biasa," jelas beliau.

Beliau menegaskan, sistem bas udara itu dijangka paling sesuai bagi mengatasi masalah pengangkutan dan kekurangan ruang ada di Bandaraya ini.

Datuk Amar Haji Taib

Jika didapati praktikal Sistem bas udara di Ibukota

Oleh: JAMILAH ABD. HAMID

berkata, kajian awal mengenai sistem tersebut menunjukkan harga bagi sepanjang 1½ batu akan menelan belanja \$9 juta.

Ia dapat membawa 6,000 orang penumpang setiap satu jam dan dari arah dengan kelajuan purata 26 batu sejam.

Di samping itu, tambang bas 1½ batu ialah 46 sen.

Kajian awal oleh pakar Sweden itu juga menunjukkan, laluan yang paling sesuai bagi sistem tersebut bermula dari Dewan Bandaraya dan seterusnya melalui Jalan Benteng, Pudu Raya, Bukit Bintang, Jalan Raja Chulan dan berakhir di Sungai Wang.

Beliau berkata, keputusan mengenainya akan dibuat tidak lama lagi.

Mengenai projek perumahan di Wilayah Persekutuan, Datuk Amar Haji Taib Mahmud ber-

kata, satu sistem "mempercepatkan pelaksanaan" akan dijalankan bagi mempercepatkan pembinaan rumah harga murah.

Sistem tersebut katanya, akan mengurangkan perbelanjaan membina rumah.

"Di bawah Rancangan Malaysia Keempat (RME), Kerajaan akan cuba mencapai matlamat membina 7,000 rumah setahun.

"Matlamat Rancangan Malaysia Ketiga (RMT) ialah 4,000 tetapi ia telah dinaikkan kepada 7,000 dalam kajian separuh penggal rancangan tersebut," jelasnya.

Datuk Amar Haji Taib seterusnya berkata, pihaknya sedang menyediakan kertas-kertas mengenai sistem baru itu untuk dipertimbangkan oleh Jawatankuasa Kabinet.